

# 1 TESALONAIKA

## Pepa Paulo ingere munnga panzi kalo-tawana tamâta simo Tesalonaika lawea

*Tesalonaika nde lawea ñalae tonje ikeno Masedonia tâno. Paulo munnga imo ñinde itula pâri ara panzi, kala tamâta pinde kalonzi tawana Yesu. Andeta kinzi Juda tamâta sikai kazâña pa Paulo, kala ipilenzi ilâ (Pâri Tamâta 17:1-10). Ilâ ipânnga Korin lawea lâ, aku muli nga Timoti imâ itapâri papa ñana Tesalonaika ngu nenzi kalo-tawana, kala Paulo ingere ngua ñine ilâ panzi. Paulo ilo ndo keno panzi, aku lâ pepa ñine tini itu ipu tini kaika pa ilonzi kalonzi. Itula vetâña arara pinde ñana ma sipaveta kuku, ñine nga itula ngua panzi ñana nenda mandiña lâ mateña nianzi wa Yesu ne zo ñana itaulo imâ kilo (4:13-18).*

<sup>1</sup> Maka ñato, Sailas nga Timoti nga naña Paulo warakângu, maka kamo taitu, kala naña angere ngua ñine imâ pa miki kalo-tawana tamâta kamo Tesalonaika lawea, miki ñinde uru kalomi tawana Tamânda Maro Kindeni nga Maro Yesu Kirisi. Maro Kindeni ne wisi-wisi wa wisi-pisi wa imâ pami.

*Paulo ilo ara ñana Tesalonaika tamâta nenzi kalo-tawana*

<sup>2</sup> Ikura zo rârâni maka uru kaloma ngere ñanami, aku maka kaporo ndançe ilâ pa Maro Kindeni. Maka uru kano pa i ñana miki kê ikura

lâ nema noŋa rârâni. <sup>3</sup> Maka kawama ndaŋge pa Tamânda Maro Kindeni, ŋana tu nemi kalo-tawana uru ipaŋo ilomi kalomi ŋana kaveta vetâŋa ara kê. Aku miki tinimi mwasa panzi tinimi pinde, kala uru kaveta wurâta ara nâ. Aku miki kao tinimi ŋana Maro Yesu Kirisi kê, kala uru kamandi kaika ku kamo nâ.

<sup>4</sup> Nima-nambwe wukale, maka kasama tu Maro Kindeni ilo ndo keno pami, aku ipateami tu ma kapâŋga i ne ŋgu sondo. <sup>5</sup> Maka kasama ŋine ŋana tu muŋga, lâ zo ŋinde maka kakai pâri ara kamâ pami, ande pâri ara ŋinde ŋandai ipâŋga pami itogo tapâriŋa kaa nâ ŋa. Ŋinde ipâŋga tava Koroani Sapâŋa ne walo wa ne mâsi kaika wa, aku miki kamora nema kalo-tawana kaika ŋinde pwataki lâ. Miki warakami nde kasama ŋana maka nema pavilâŋa lâ zo ŋinde maka kamo ŋginimi. <sup>6</sup> Miki kaloŋo Maro Kindeni ne ŋgua lâ, kala miki kapaveta kuku maka nema vetâŋa tava Maro Ŋalae ne vetâŋa. Ŋineŋga malia ŋalae tina ipâŋga pami lâ, andeta Koroani Sapâŋa iveta ilomi ara kala miki kandeka ku kamo kapaipa kuku pâri ara ŋinde. <sup>7</sup> Aku nemi vetâŋa ŋinde itula nzâla ara ndo panzi kalo-tawana tamâta rârâni simo Masedonia tâno wa Akaia tâno wa. <sup>8</sup> Miki katula mâsi ara ŋana koka Maro Ŋalae ne ŋgua muli, aku ŋinde ilâ itogo wâŋgu ne nduŋeŋa mwasina. Andeta nduŋeŋa ŋinde ilâ ipâŋga lâ Masedonia tâno wa Akaia tâno simbonzi nâ, ande tia. Ikura laweŋa rârâni, ande tamâta siloŋo parinami tu miki kalomi tawana Maro Kindeni. Mine kala maka nema wurâta ŋana katula parinami panzi kê keno, nde

tia. <sup>9</sup> Aku kinzi warakanzi kala uru situla ŋgua ŋana vetâŋa arara ŋinde miki muŋga kaveta, lâ zo ŋinde maka kamo kumi. Kinzi situ parinami tu miki kapu mulimi panzi maro laŋeja lâ, aku kapalele ilomi kalomi ilâ pa Maro Kindeni Via Tamwata, ina Maro Mao Kanaŋo, aku kaponu muli pa i simbo nâ. <sup>10</sup> Aku situ parinami tu miki uru kao tinimi ŋana zo ŋinde Maro Kindeni Natu ma ipile samba lawea ku itaulo imâ kilo. Inani kala Yesu, muŋga imâte lâ, andeta Maro Kindeni ipaŋo i imo via kilo. Aku i ma ikea ŋana kinda kê, kala ma tamo ara lâ zo muli ŋinde Maro Kindeni ne wisi-nâna ŋana tamâta nenzi kiesaka kê ma ipâŋga nia yo.

## 2

### *Paulo itula ŋgua pwataki ŋana wurâta muŋga iveta lâ Tesalonaika*

<sup>1</sup> Nima-nambwe wukale, miki warakami kasama tu maka muŋga kaveta wurâta kaa nâ lâ zo ŋinde kamo kumi, ande tia. <sup>2</sup> Miki kasama tu maka muŋga kamo Pilipai lawea, aku lâ lawea ŋinde maka kakai nâna ŋalae. Kinzi siyaula karaema wa siporo ŋgua pavaligiŋa pama wa. Andeta lâ zo ŋana maka kamâ pami, nenda Maro ŋalae Kindeni ipu tini kaika pa iloma kaloma, kala maka kamege ŋana kazâŋa ŋinde kê, ande tia ndo. Maka kakisi kaika nâ, aku katula Maro Kindeni ne pâri ara pami. <sup>3</sup> Aku lâ zo ŋana maka kanomi tu kapalele ilomi kalomi ilâ pa Yesu, ande maka kaporo ŋgua soki ku kaveta vetâŋa potomule wa laŋeja wa, ande

tia. <sup>4</sup> Maro Kindeni isama maka kilalama lâ, aku i tamwata ipatea wurâta pama tu ma katula i ne pâri ara. Mine kala maka ñandai iloma tu tamâta ma sisuka maka ñama kâki nga. Maro Kindeni simbo nâ imora iloma kaloma pwataki lâ, aku maka iloma tu i nâ ma ilo ara pama ñana nema wurâta kâ. <sup>5</sup> Miki kasama lâ, aku Maro Kindeni kala isama mine nâ tu maka muŋga kaporo ñgua mâru-mâru pami, ande tia ndo. Aku maka ñandai iloma yosi ñana nemi kelekele kala kaporo ñgua ara pami. <sup>6</sup> Lâ zo ñinde, maka ñandai iloma tu miki ma kandekanama nga. Aku mine nâ, maka ñandai iloma tu tamâta pinde ma sindekanama nga.

<sup>7</sup> Mao nâ, maka kamo Yesu Kirisi ne pâri-tamâta. Mine kala kalonjo nga; ambo maka iloma tu miki ma kasukama ñana kelekele pinde kâ, ande maka kakura ñana kaporo kaika pami tu kaveta mine. Andeta zo ñinde maka kamo kumi, ande maka kamo mwasa nâ, itogo taine uru imagegea natu puro-puro mine. <sup>8</sup> Maka iloma ndo keno pami; mine kala maka kandeka nâ ñana kaporo katula Maro Kindeni ne pâri ara pami. Aku maka kala kapaveta sondo ñana kapayaula nema via ñana kavila miki kâ, ñana tu maka iloma ndo ikeno pami. <sup>9</sup> Nima-nambwe wukale, miki kasama lâ ñana wurâta ñalae maka muŋga kaveta, lâ zo ñinde kamo kumi. Maka kamâ ñana katula Maro Kindeni ne pâri ara pami, aku maka tinima pwâka tu miki ma kaveta wurâta ñalae ñana kakatona maka ñana kâŋa-nuŋa kâ. Mine kala maka kaveta wurâta kaika lâ kari wa mbo wa, ñana kakai mbumbu

tu kapako kapwama.

<sup>10</sup> Miki kasama lâ, aku Maro Kindeni kala isama mine nâ ñana vetâña rârâni maka kaveta lâ miki kalo-tawana tamâta ñginimi. Maka nema vetâña ñinde nde ara ndo lâ Maro Kindeni nao; maka kaveta vetâña soki tonje tia. <sup>11</sup> Miki kasama tu maka muña kaveta kema ara nâ pa miki taitu-taitu, itogo tamâta uru iveta kie ara panzi natu mine. <sup>12</sup> Mao nâ, maka kaporo ñgua ñana igagati ilomi kalomi ku ipu tini kaika pami. Aku maka kanomi tu ma kamo sonde, ikura Maro Kindeni tamwata ipatea pami mine. Maro Kindeni ina isarawami tu ma kasama i ne walo ñalae, aku isarawami tu ma kamo kunzi ñgu ñine i uru ikai maro panzi.

*Kinzi kalo-tawana tamâta lâ Tesalonaika lawea simandi kaika ñana sikale malia kâ*

<sup>13</sup> Lâ zo ñana miki kaloño Maro Kindeni kawa ñgua maka katula pami ñinde, ande miki kakai ñgua ñinde itogo tamâta nâ nenzi ñgua, ande tia. Miki kaloño ku kakai ñgua ñinde itogo Maro Kindeni kawa ñgua mao. Aku mao nâ, ñgua maka katula pami ñinde nde Maro Kindeni kawa ñgua. Aku i tamwata uru ikai wurâta kaika lâ miki kalo-tawana tamâta ilomi kalomi. Ikura zo zo maka kawama ndanje ilâ pa Maro Kindeni ñana ñine kâ. <sup>14</sup> Nima-nambwe wukale, miki kapânga katogonzi Maro Kindeni ne kalo-tawana tamâta simo Judia tâno, kinzi ñinde sipaipa kuku Yesu Kirisi lâ. Miki kakai malia lâ warakami nemi ñgu mbaunzi, itogo kalo-tawana tamâta simo Judia tâno muña sikai malia lâ Juda ñgu mbaunzi mine. <sup>15</sup> Muña kinzi

Juda ngu sipu Maro Yesu tavanzi kinzi nguatulâna tamâta pâta simâte, aku sinjara maka tona. Kinzi tanjanzi kaika ku sikai kazâna pa vetâna ara rârâni Maro Kindeni ilo papa ninde. Aku kinzi simo sitogo tamâta rârâni nenzi nânâo mwasina. <sup>16</sup> Kinzi sitogo tu sipono nzalama, njana maka ma kakura tu katula pâri ara panzi tamâta lâ tinikoa ngu tia. Kinzi tininzi pwâka tu Maro Kindeni ma ivilanzi ngu ninde tu simo vianzi ku simo nâ. Mine kala ikura zo zo kinzi siveta kiesaka, kala kiesaka ninde ipânnga njalae tina. Aku njana njine kâ Maro Kindeni ne wisi-nâna nde imâ panzi lâ.

*Paulo ilo ndo tu imoranzi kalo-tawana tamâta lâ Tesalonaika lawea kilo*

<sup>17</sup> Nima-nambwe wukale, kinzi Juda tamâta sinjara maka lâ, kala kapilemi ikura zo pinde. Maka kamora naomi tia, andeta iloma nde keno pami yo. Maka iloma njalae tina tu kamorami kilo. Mine kala maka kaveta wurâta kaika karoto nzâla njana kataulo kamâ pami. <sup>18</sup> Maka iloma tu kamâ pami, aku naña Paulo warakânngu apatogo tu ataulo amo kumi mbwaninggu pinde. Andeta Sadana isae nzâla njanama. <sup>19</sup> Maka iloma tu kamo kumi, njana tu lâ zo njana nenda Maro Yesu ma itaulo imâ kilo, ande kelekele ndia ma isuka maka tu kamandi kaika ku kandeka lâ i nao, a? Annga kelekele ndia ma itula pwataki tu maka kaveta nema wurâta ara lâ, a? Maka ma kandeka njana miki ni. Tamâta tonje ipole miki njana iveta ndekâna ipipi lâ iloma kaloma, ande tia. <sup>20</sup> Mao nâ, maka ma kandeka njana miki

kâ, aku miki warakami ma kaveta iloma kaloma ikeno ara ndo.

### 3

*Paulo isupwa Timoti ilâ pa Tesalonaika lawea  
ņana isukanzi kalo-tawana tamâta*

<sup>1</sup> Maka kamo tava iloma malia mine lee, ñineŋga iloma patea tu zo ŋga ipâŋga lâ. Mine kala maka kapa ŋgua tu maka rua ma kamo Atens lawea,

<sup>2</sup> aŋga Timoti nde ma kao imâ pami. Ninda-nambwe Timoti nde Maro Kindeni ne kuleŋa tamâta ŋana itula pâri ara ŋana Yesu Kirisi kâ. Maka rua kao i imâ ŋana isukami ku ivilami, ŋana nemi kalo-tawana ma ikeno kaika nâ.

<sup>3</sup> Ambo Timoti ma imâ pami tia, ande nâna wa malia nemi ŋgu siveta pami ñinde ma iveta miki pinde ilomi kalomi rârâ. Miki warakami nde kasama tu Maro Kindeni muŋgani ipatea kinda tu ma takale malia mine nâ ŋana nenda kalo-tawana kâ. <sup>4</sup> Muŋga maka kamo kumi, aku lâ zo ñinde maka kapaimi tu malia kie-kie ma ipâŋga pa kinda. Aku miki kasama tu zo sakamao mine nde imâ ipâŋga lâ. <sup>5</sup> Mine kala naŋa amo nâ, ande tia. Naŋa atu asama ŋana miki nemi kalo-tawana tu ikeno mana, ande kala ao Timoti imâ pami lâ. Naŋa kalonġu loko tu koroani saka nenzi koipu ŋalae nde iveta samâŋa pami tâ ku isowe ilomi kalomi, kala maka nema wurâta ilâ kaa nâ. Andeta tia.

*Paulo indeka nâ, ŋana tu Timoti ikai ŋgua ara  
itaulo imâ*

<sup>6</sup> Ayo, Timoti imâ imo kumi lee, ñinennga ipilemi ku ilâ. Kala munnga nâ imâ ipânnga pa maka lâ, aku itapâri ñgua ara ndo pama. Itula ñgua tu miki nemi kalo-tawana ikeno kaika ndo, aku miki uru tinimi mwasa nâ panzi tinimi pinde. Aku itapâri tu ikura zo rârâni miki kalomi ñgere ñana maka kê, aku wisimi ara pama tona. Aku miki kala ilomi ñalae tu kamâ kamora maka, itogo maka iloma ñalae tu kamâ kamora miki mine nâ. <sup>7</sup> Nima-nambwe wukale, maka kalonjo parinami tu nemi kalo-tawana ikeno kaika ndo, aku ñinde ipu tini kaika pama lâ zo ñinde malia wa nâna rârâni ipânnga pama lâ. <sup>8</sup> Maka kasama tu miki kapaipa ndo kuku Maro Ñalae, kala ñine maka iloma ara ku wisima puu ndue lâ. <sup>9</sup> Maka kaloma ñgere ñanami ku kandeka pâta lâ nenda Maro Kindeni nao. Maka kawama ndançe ilâ ñalae pa Maro Kindeni, andeta nema ndekâña nde ñalae ndo, ipole nema ñgua ñinde. <sup>10</sup> Maka uru kano kaika pa Maro Kindeni ikura kari wa mbo wa. Maka kano tu i ma iveta nzâla pama ñana kamâ kamorami kilo. Ñinennga maka ma kakura tu kasukami, aku nemi kalo-tawana ma ipânnga ñalae.

*Paulo ino pa Maro Kindeni tu ma io i ilâ panzi*

<sup>11</sup> Maka iloma tu Tamânda Maro Kindeni tamwata kuku nenda Maro Ñalae Yesu rua ma sikai nzâla piti, ñana maka ma kamo kumi. <sup>12</sup> Aku maka iloma tu Maro Ñalae ma isuka miki, ñana nemi tini-mwasa panzi kalo-tawana tamâta sitavanzi tamâta rârâni ma ipânnga ñalae, itogo maka nema tini-mwasa ikeno pa

miki mine nâ. <sup>13</sup> Maka iloma tu Maro Kindeni ma isuka nemi kalo-tawana. Mine kala lâ zo ŋana nenda Maro Ŋalae Yesu tavanzi ne tamâta rârâni ma sitaulo simâ kilo, ande Tamânda Maro Kindeni ma imora miki tu kamo mbâra-mbâra ndo, nemi kiesaka tonje tia.

## 4

### *Kinda ma taveta vetâŋa potomule ndimo*

<sup>1</sup> Nima-nambwe wukale, maka muŋga kapananami ŋana vetâŋa arara ŋana miki ma kapaveta kuku. Ambo miki ma kapaveta kuku vetâŋa arara ŋine, ande Maro Kindeni ma ilo ara. Aku maka kasama tu nemi vetâŋa ikeno mine nâ. Kala ŋine maka kakai Maro Ŋalae Yesu ndamwa ku kaporo kapu tini kaika pami tu miki ma kaveta vetâŋa arara mine ipâŋga ŋalae. <sup>2</sup> Maka muŋga kakai Maro Ŋalae Yesu ndamwa ku katula ŋgua tukuŋa rârâni yâti, aku miki kalonjo lâ.

<sup>3</sup> Maro Kindeni ilo tu miki ma kamo ilomi mbâra-mbâra, aku i ilo tu miki ma kanjenje ŋana vetâŋa sakamao ŋana kapalulua tinimi potomule kê. <sup>4</sup> I ilo tu miki ma kapakatona sondo ŋana vetâŋa sakamao tava ilo-kalo sakamao uru ipâŋga nâ lâ ilomi. I ilo tu miki ma kamo sondo, aku ma kapaveta kuku vetâŋa ara rârâni i tamwata ipatea pami ŋinde. <sup>5</sup> Tia ma miki kambe ŋana ilo-kalo wa vetâŋa sakamao ŋinde, aku miki warakami ma kaveta vetâŋa sakamao ŋana kapalulua tinimi potomule kê, itogo kinzi tinikoa uru siveta mine. Kinzi ŋinde sizizâla ŋana Maro Kindeni ne pateâŋa, kala siveta mine.

<sup>6</sup> Miki ma kaveta soki tonje mine panzi kalo-tawana tamâta ndimo. Maka muŋga katula ŋgua pwataki pami tu muli ŋga Maro Njalae ma ipare nia panzi tamâta ea siveta vetâŋa sakamao kie mine rârâni. <sup>7</sup> Maro Kindeni ipatea kinda ŋana tapaveta kuku vetâŋa potomule mine, ande tia ndo. Ipatea kinda ŋana tamo sondo lâ i nao. <sup>8</sup> Mine kala tamâta ea ipu muli pa ŋgua tukuŋa ŋine, ande i ipu muli panzi tamâta tia; ipu muli pa Maro Kindeni, ina kala uru io ne Koroani Sapâŋa imâ pami.

*Kinda ma tapakatona sondo ŋana nenda vetâŋa kê*

<sup>9</sup> Muŋga Maro Kindeni ipanana miki warakami ŋana vetâŋa ŋana tinimi mwasa panzi kalo-tawana tamâta kê. Mine kala naŋa ma aŋgere ŋgua pinde imâ pami ŋana vetâŋa ŋinde kê, ande tia. <sup>10</sup> Aku mao nâ, miki uru tinimi mwasa nâ panzi kalo-tawana tamâta simo lawea ndoni lâ Masedonia tâno. Ambo taitu nima-nambwe wukale, maka iloma tu kapu tini kaika pami ŋana miki ma kaveta vetâŋa ara mine ipâŋga ŋjalae ndo.

<sup>11</sup> Miki ma kapakatona sondo ŋana kamo mwasa nâ, aku kaveta warakami nâ nemi kelekele. Kapakatona warakami, aku kaveta wurâta tava warakami nâ mbaumi, ikura maka muŋga kapananami mine. <sup>12</sup> Ambo miki ma kaveta mine, ande wurâta ma ikeno panzi tinimi pinde ŋana sisukami ŋana kelekele kê, ande tia. Aku tamâta simo niaka ŋana pâri ara kê ŋinde ma sindeka nâ ŋana nemi vetâŋa kê.

*Maro Njalae ma itaulo imâ kilo nana igona kinda kê*

<sup>13</sup> Nima-nambwe wukale, maka iloma tu miki ma kasama ngua mao nana vetâna ndia ma ipânnga panzi mateņa tamâta. Tia ma kalo-sukâna njalae ipânnga pami, itogo uru ipânnga panzi tamâta njinde kalonzi tawana Maro Kindeni tia. Kinzi njinde uru sio tininzi nana nenzi mandija lâ kuru nia, ande tia. <sup>14</sup> Annga kinda nde kalonda tawana tu Yesu imâte lâ, njineņa imandi imo via kilo. Mine kala kinda tasama tu Maro Kindeni ma ipanjonzi kalo-tawana tamâta njinde muņa simâte, aku ma ionzi simo kuku Yesu. <sup>15</sup> Maka katula Maro Njalae kawa ngua pwataki pami mine; lâ zo nana Maro Njalae ma itaulo imâ kilo kê, ande kinda tamâta kala tamo viânda lâ tâno kulu njine ma tamuņa panzi tamâta njinde muņa simâte, ande ma tia. <sup>16</sup> Nana tu Maro Kindeni ma isuna kawa, aku anjelo nenzi koipu njalae ma isarâwa, aku Maro Kindeni ne tando ma ita. Aku Maro Njalae tamwata ma ipile samba ku indue imâ. Aku tamâta njinde muņa simâte tava nenzi kalo-tawana, kinzi njinde ma simandi muņa, aku ma simo vianzi kilo. <sup>17</sup> Njinde ma ilâ lâ, njineņa Maro Kindeni ma igona kinda tamâta kala tamo viânda lâ tâno kulu njine, aku ma takâki talâ kunzi pa nia maa njinde ikeno âta. Aku kinda rârâni ma tamo taitu kuku Maro Njalae, ma tamo mine ku tamo nâ. <sup>18</sup> Mine nde ara nana miki kalo-tawana tamâta rârâni ma katula ngua njine pwataki, aku kapaturu warakami ilomi kalomi tu ma ipu tini kaika pami wa iveta wisimi puu ndue wa.

## 5

*Kinda tamo tao tininda nâ ɲana Maro Ɲalae ne zo ɲana ma itaulo imâ kilo*

<sup>1</sup> Nima-nambwe wukale, maka nema wurâta ikeno ɲana kaɲgere ɲgua ɲana zo ndia wa kari tai ɲapia vetâɲa rârâni ɲinde ma ipâɲga kâ, ande tia. <sup>2</sup> Miki warakami kasama tu Maro Ɲalae ne zo ɲana itaulo imâ kilo kâ nde ma ipâɲga nâ, itogo panawe tamwata imâ ɲana ne panaweɲa lâ mbo ɲgini-ɲgini, aku kinda tazizâla ɲana. <sup>3</sup> Kinzi tamâta ma siporo mine, “Zo ɲine nde ara pâta, kala tamo ara nâ”. Andeta lâ zoni ndaina, ande vetâɲa ɲana izavarunzi kâ ma nao panzi imâ walele nâ, itogo nâna uru ikainzi taine sipaguguanzi natunzi mine. Aku kinzi tamâta ma sikura tu siɲgeɲge ɲana nâna ɲinde kâ, ande tia.

<sup>4</sup> Aɲga nima-nambwe wukale, miki ɲandai kamo kondoma ilo ɲga. Mine kala lâ zo ɲana miki kamora mâsi ɲinde imâ ipâɲga, ande miki ma wisimi motu itogo tamâta wisi motu ɲana panawe tamwata imâ ɲana ipanâwe kâ, mine ndimo. <sup>5</sup> Miki kalo-tawana tamâta rârâni nde ɲana kamo kari wa sinâla nâ ilo. Kinda ɲandai tamo mbo tava kondoma nenzi tamâta ɲga. <sup>6</sup> Kinzi tamâta simo niaka ɲana pâri ara kâ ɲinde uru sikeno nâ, andeta kinda ma taveta mine ndimo. Ara ɲana kinda ma tao tininda nâ, aku tapakatona ilonda kalonda sondo ndo. <sup>7</sup> Kinda tasama tu tamâta uru sikeno lâ mbo nâ, aku uru sinu lââ kaika ku sidauda lâ mbo nâ. <sup>8</sup> Aɲga kinda nde tamâta ɲana tamo sinâla nâ ilo. Mine kala ara ɲana kinda ma kalonda

ngere sondo. Vetâña ñana kalonda tawana Maro Kindeni kâ, anğa vetâña ñana tininda mwasa panzi tininda pinde, vetâña rua ñinde nde itogo nenda pasawaña ñana tingi-tingi kâ. Aku vetâña ñana tao tininda pa Maro Kindeni tu ma via mao ilua kinda lâ samba lawea, ande vetâña ñinde itogo nenda siŋgâra kaika ñana tasawa lâ kulunda mine. Aku kinda tamandi kaika lâ ñinde tini. <sup>9</sup> Maro Kindeni ñandai ipatea tu i ma nâna ilua kinda ñana nenda kiesaka kâ. Ipatea tu nenda Maro Njalae Yesu Kirisi ma ikai kinda piti lâ kondoma ilo ku via mao ilua kinda. <sup>10</sup> Yesu imâte ñana ikai nzâla piti pa kinda tu ma tamo ara kuku i, aku lâ zo ñana i ma itaulo imâ kilo, ambo kinda tamo viânda tâku tamâte tâku, ande ma tamo viânda kuku i. <sup>11</sup> Mine kala ara ñana miki taitu-taitu ma kapu tini kaika panzi kalo-tawana tamâta, aku kavilanzi ñana simandi kaika tona, itogo miki uru kaveta mine.

*Maro Kindeni uru ivilanzi kalo-tawana tamâta ñana nenzi vetâña ara kâ*

<sup>12</sup> Nima-nambwe wukale, Maro Njalae ipateanzi tamâta pinde tu siveta wurâta ñalae lâ miki ñginimi. Ipateanzi ñana sikai poe pami ku siveta nemi ilo-kalo sondo. Maka kanomi tu miki ma kamege ñananzi tamâta ñinde. <sup>13</sup> Miki ma kamege ndo ñananzi ku kao ilomi ndo ilâ panzi, ñana tu nenzi wurâta ñinde nde ara ndo. Aku miki rârâni ma kamo ilomi kalomi taitu nâ. <sup>14</sup> Nima-nambwe wukale, maka kanomi tu miki ma kaporo ñgua kaika panzi kalo-tawana tamâta ñinde simo itogo wulitia tamwatanzi, ñana kapaño ilonzi kâ; aku kapu tini kaika

panzi tamâta ñinde uru simo kalonzi loko nâ; aku kavilanzi tamâta ñinde nenzi walo keno tia. Aku miki rârâni ma kamo mwasa nâ kunzi tamâta rârâni. <sup>15</sup> Ambo tamâta tonje iveta kie sakamao pami, ande miki ma kakatu mbuku kilo papa i ndimo. Ikura zo rârâni, ara ñana miki ma kamandi kaika ñana kaveta vetâña ara nâ panzi kalo-tawana tamâta sitavanzi tamâta rârâni.

<sup>16</sup> Ikura zo rârâni, ande ara ñana miki ma kandeka ku kamo nâ. <sup>17</sup> Aku ara ñana miki ma kakai noña pa Maro Kindeni ikura zo zo. <sup>18</sup> Ambo vetâña tonje ma ipânga pami ku iveta ilomi malia, ande ara ñana miki ma kawami ndanje pa Maro Kindeni. I ilo tu miki tamâta kala kapaipa kuku Yesu Kirisi ñinde ma kaveta mine.

<sup>19</sup> Lâ zo ñana Koroani Sapâña itu iveta wurâta tonje lâ miki ilomi, ande miki ma kapono nzâla ñana wurâta ñinde kê ndimo. <sup>20</sup> Ambo tamâta pinde ma situla Maro Kindeni kawa ñgua pwatakî pami, ande miki ma tinimi pwâka ñana ñgua ñinde ndimo. <sup>21</sup> Miki ma ilomi pateo sondo ñana ñgua rârâni wa vetâña rârâni wa. Ara ñana miki ma kasaña ñgua ara tava vetâña ara kaika ndindi nâ, <sup>22</sup> aku kanjenje ñana vetâña potomule rârâni kê.

<sup>23</sup> Maka kano pa Maro Kindeni, ina wisi-pisi warika, tu ma ilele miki ilomi kalomi ndo, ñana miki ma kaveta vetâña ara nâ, ikura i ilo papa mine. Aku maka kano papa i tu ma ikatona karaemi wa koranami wa, ñana miki ma kamo mbâra-mbâra nâ, nemi soki tonje tia, lâ zo

ɲalae ɲinde Yesu Kirisi ma itaulo imâ kilo.  
<sup>24</sup> Maro Kindeni isarawami muɲgani lâ, aku i ma iveta vetâɲa ɲinde ipâɲga pami, ɲana tu i uru iveta ikura ne ɲgua pâɲa râɲâni.

<sup>25</sup> Nima-nambwe wukale, ara ɲana miki ma kalomi ɲgere ɲanama, aku kano pa Maro Kindeni tu ma isukama. <sup>26</sup> Aku ara ɲana miki taitu-taitu ma kapatâɲo mbaumi, ikura kinda kalo-tawana tamâta nenda mâsi mine. <sup>27</sup> Naɲa akai Maro ɲalae ndamwa ku aporo ɲgua mine pami: miki ma kapono ɲgua râɲâni ikeno pepa ɲine tini pwataki panzi kalo-tawana tamâta râɲâni siloɲo.

<sup>28</sup> Nenda Maro ɲalae Yesu Kirisi ne wisi-wisi imâ pami.

**MARO KINDENI KAWA NGUA**  
**The New Testament and Psalms in the Sio Language**  
**of Papua New Guinea**  
**Nupela Testamen long tokples Sio long Niugini**

Copyright © 1995 Wycliffe Bible Translators

Language: Sio

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-09

---

PDF generated using Haiola and XeLaTeX on 4 Mar 2023 from source files dated 22 Nov 2019

b3b81168-89df-5bc3-8b0c-cf72ef93d3de